

**INTERVENSAUN IHA ABERTURA DEBATE LEI OJE 2013 SEKRETÁRIU-JERÁL
FRETILIN NO DEPUTADU, HODI BANKADA PARLAMENTÁR FRETILIN NIA NARAN**

**KOMBATE KIAK NO HATUUN INFLASAUN
NU'UDAR "PEDRA-DE-TOQUE " HODI LAO BA DEZENVOLVIMENTU**

Na'i Presidente Parlamentu Nasional,

Na'i Primeiru Ministru!

Ilustre membru sira iha Meza!

Na'i deputadu sira!

Na'i Membru Governu sira!

NA'I-ULUN SIRA!

Na'i no inan-feto sira!

Ho imi hotu nia permisaun, molok hare'e ba kestaun sira ligadu ho Orsamentu Tintinan Estadu nian no, liu-liu, proposta-lei OJE 2013, hau hanoin importante tebes atu tau momoos FRETILIN nia postura iha Uma Lulik idane'e, no ba liur mos, iha lejislatura dah'toluk idane'e. FRETILIN fó tiha ona prova katak nia Força Polítika ida interesadu nafatin atu defende ita-nia povu tomak nia interesse, kaer ukun ka la kaer ukun.

Ami-nia preokupasaun ho Timor-Leste nia situasaun mak determina ami-nia postura política tomak. Nune'e, hodi buka dalan hotuhotu ne'ebé iha hodi bele kontribui. Ami halo ho laran moos, hatete loloos no ho objetividade ne'ebé sempre karateriza ami. Bainhira hatudu problema no apresenta propostas ami sempre iha nu'udar objetivu fundamental atu kontribui ho pozitivu, atu hetan solusaun. Dala barak, ami-nia postura buka atu provoka mudansa makaas no estruturante ba ita-nia Estadu tomak nia vida. Tanba ne'e, la monu ba ema hotuhotu nia laran. Maibé ami halo atu labele kompromete hela oportunidade no vantejem sira ne'ebé mak ita-nia rain sei goza, maski ho forma relativa liu tan ona.

Ita hotu hatene katak ita-nia ekonomia, ekonomia ida liu-liu ba importasaun no ho dependénsia makaas ba reseita hosi minarai. Tanba ita importa kuaze buat hotuhotu, no ho folin espekulativu, ita fakar ita-nia rekursu, liu-liu, mai hosi fontes naun-renováveis. Hamutuk ho ne'e, ita loke dalan ba inflasaun atu tama sem kontrolu. Atu combate idane'e tenki hola kedas ona medidas, ho aten-brani, ho natureza makro-ekonómica no fiskál.

Na'i ulun-boot Primeiru Ministru. Ita na'in rua moris ona experiénsia kaer ukun. Ita hatene katak iha konjuntura rua no, loos, ukun rua ho forma lahanesan. Realidade idane'e laós segredou ba ema ruma. Maibé ita-nia experiénsia hirakne'e hanorin mai ita, iha tinan sanulu ikus-liu nia-laran, katak ukun diak sei la neon-maus ba desregulasaun, ho experimentalizmu no fasilitizmus iha despeza pública, ho amigizmu no tendénsia exkluzivista. Iha tempu badakoan ida nia laran, tinan sanulu, ita prontu ona atu hamutuk reflete kona-bá ukun ita-nia rain, halo análise ho objetividade no hamutuk lao ba oin ba síntese ida ne'ebé tenki iha ona.

Iha fatór balu ne'ebé influensia ita-nia postura bainhira ita kaer-ukun. Balu hosi laran, seluk, hosi liur. Kona-bá hirakne'e, laíha liman invizível ruma ne'ebé mak obriga jogu nia regras, tuur fali iha ita-nia fatin. Bainhira idane'e mosu ona, ita sei lakon de'it fier ba ita nia án-rasik, ita sei fier de'it ba sira seluk. Dala barak ita buka hatudu kontráriu, hodi bele haboot de'it ita-nia foti-án, auto-estima. Ikus liu, rezultadu diak no ladiak sira sei depende liu ba makro-política ne'ebé mak ita defini, makro-política ho oin barbarak – fiskál, ekonómica, finanseira, sosiál, kulturál, ho liafuan badak, dezenvolvimentu ne'ebé ita hakarak integradu no integrál. Xave mak ita

presiza halo política fiskál ida ekilibrada, política ekonómika no sosiál inkluziva no jestaun kompetente no transparente ba finansas públikas. Ita-nia hakarak mak ukun diak.

Importante atu ita hanoin katak ekonomia loloos segnifica halo jestaun rasionál ba rekursus ne'ebé sempre uitoan. Ita bele kompromete ekonomia bainhira ita hanoin katak solusaun ba ita-nia problema hatuur iha uza barbarak no ho lais, hopu hanesan kuda, reseita no rekursu seluk, no lais kedes ona. Ita bele, nune'e, namlele iha política ba aumenta despeza sem hare'e ba ita-nia ekonomia nia kapasidade rasik atu absorve no ba ita-nia kapasidade idaidak no hotuhotu hamutuk atu ezekuta ita-nia planu sira. Idane'e vale mos ba rekurus umanus. Ita hakarak rezolve buat hotuhotu iha tempu badak, ita sai fali vítima ba ita-nia vontade rasik atu responde ba povu nia problemas. Tanba ita hakarak, dala barak hakarak halo lais hanesan ahi nia lais, ita la-hare'e ba estájiu dezenvolvimentu ita-nia sosiedade nian, no ba kapasidade subjetiva ba intervensaun ita-nia kapitál umanu nian. Maibé hau refere ba kualidade laós ba kuantidade. Ho idane'e, ita hahoris ekonomia ida ne'ebé loloos kedan balaun ida. Ita hahoris balaun ho ar manas iha laran ne'ebé, hirak ne'e loos, lais hanesan ahi-lakan, lakon de repenti iha ita-nia ulun leten, halai ba fatin dook. Sira la presiza iha liras atu bele semo, tanba laloran Tasi Mane no anin hosi Tasi Feto tulun hadook tiha sira, hosi ita-nia kontrolu.

Halo inflasaun ba aloksaun rekursu, hatutan tan falta efisiénsia no efikásia iha ninia uzu, iha tempu badak no bele iha tempu médiu, halo ita bele provoka kresimentu ekonómiku ida ema seluk inveja. Maibé ita labele iha dúvidas katak forma ita intervém iha vida política, sosiál no ekonómika nune'e, bele mos lori hamutuk ho nia doit nia sorin seluk ne'ebé mak: i. inflasaun; ii. Timoroan sira sei marjinalizadu bebeik tan; iii. Asimetria iha dezenvolvimento entre área urbana ho área rurál sira; iv. Halo ita-nia sistema ekonómiku no sosiál nakselok; v. Abuzu ba podér; vi. Korrupsaun.

Bainhira ho ekonomia ida atu halo de'it importasaun, inflasaun moos sei tama-mai ho sasán ita importa. Tenki kaer ho kuidadu tebtebes bainhira ita hatama rekursus finanseirus ba ekonomia ida ne'ebé sei kikoan hanesane'e. Mak ita halo barak demais, hodi liu fali kapasidade absorsaun ekonomia nian rasik, ita tama iha risku atu provoka distorsaun makaas iha Merkadu. Perigozu liu tan mak bainhira distorsaun ne'e atinji Merkadu traballu. Nu'udar rezultadu ita iha servisu ho nia kustu karu ba bebeik, no ninia rezultadu kiak ba bebeik. Ita lakon iha produtividade no iha kualidade.

Nu'udar konsekuénsia ita sei iha hanesan tuir-mai: i. iha planu doméstiku: ekonomia nia kresimentu ida la a favór ba sira ne'ebé presiza liu tan, sira ne'ebé ho rendimentu kiik, ho podér kompra kiik-liu, sira maioria. (Idane'e bolu kresimentu la-hó kualidade, kresimentu ekonómiku la-hó dezenvolvimento ekonómiku no sosiál. Iha tempu médiu, sira ne'ebé kiak, sei barak liu tan. Klase média ne'ebé seidauk makaas sei mate kedes); ii. Iha planu ita-nia relasaun ho Merkadu rejionál no globál: ita-nia ekonomia super-inflacionada, ho merkadu distorsidu (liu-liu Merkadu traballu) sei ladún competitivu ona, ka loos kedan, la competitivu loos. (Inflasaun rumá de repenti ho 11 to'o 12% ba ekonomia ida tradisionalmnete competitiva no produtiva tebtebes grave ona. Sei grave liu tan bainhira idane'e mosu iha ekonomia ida ho karaterística hanesan ita-nian, ne'ebé setór produtivu moris iha namalaik totál, balansa komersiál negativa tebtebes, reseita doméstika nem to'o atu bele selu saláriu ho vensimentu funzionáriu públiku sira-nian.

Na'i Prezidente Parlamentu Nasional!

Na'i Primeiru Ministru!

Na'i-ulun sira!

Knar ukun kompleksu tebtebes. Ami hatene ho ami-nia experiénsia rasik. Bainhira laíha rekursus, ita halo buat hotuhotu hodi hetan. Bainhira, no parese rekursus barbarak hela de'it, sem ita hanoin, ita bele sai fali vítima ba rekursu sira. Atu idane'e labele mosu, ita presiza sara-án ho kuidadu tomak.

Nu'udar defensór indiskutível ba aumentu kualidade vida ba ita-nia povu tomak, ami, n'ebé uluk brani mehi ba ukunrasikán no halo ami-nia mehi sai duni realidade, tenki ohinloron no agora duni, halo reflesaun hamutuk kona-bá saída mak ita halo ona iha tinan sanulu liu-bá hodi ita bele boot tuir ita-nia nesesidade no tuir kapasidade atu intervém atu bele muda ita ema nia mentalidades. Rekursus ne'ebé ita iha, sira laós rohan laek. Ita bele no tenki halo sira iha nafatin tinan ba tinan. Xave mak oinsa'a uza ho rasionál a favór dezenvolvimentu ida inkluzivu-liu, ekiibradu-liu, justu-liu no sustentável no ba jerasaun hotuhotu nia moris diak.

Dezafiu boot ne'ebé ita hasoru beibeik ho kondisaun nune'e mak oinsa'a ita atu hili dalan diak-liu atu tuir. Ita hakarak lao lalais, halai duni. Maibé oinsa'a ita bele aselera prosesu? Sa'a katalizadór mak ita presiza uza?

Laíha dúvida katak prosesu dezenvolvimentu, hanesan looops kedan ho halai maratona ida. Iha ita-nia kapasidade no forsa nia rohan, ita simu atu hasoru dezafiu iha kampu sosiál, kulturál, polítiku, ekonómiku no finanseiru. Tanba ne'e, hosi hahú to'o ita atinji meta, ita tenki hatene kontrola velosidade ita hakarak uza, maibé labele pára, atu ita-nia iis labele kotu-tiha no monutuun molok atinji ita-nia objetivus. Buat hotuhotu iha ninia tempu atu tasak. Ita presiza hein to'o prosesu tasak, liu hosi política rasionalizasaun ba uzu rekursu sira no halo definisaun momoos ba prioridades tuir ita-nia kapasidade atu ezekuta planu, programa no projeto sira.

Na'i Presidente!

Na'i Primeiru Ministru!

Na'i-ulun sira!

Iha kinkéniu ikus Timor-Leste hetan sorti ho minarai nia folin sae makaas. Iha tinan lima ka nen ikus nia-laran, ita mos semo ho korajem iha política fiskál no makro-finanseiru ho nia objetivu atu rezolve problemas povu nian. Pelu menus idane'e mak uluk, no ohinloron sei nafatin, ita barak nia objetivu. Ita defini prioridades oioin atu ita bele kumpri. Ita aumenta boot tebtebes ita-nia despeza públiku tinan-tinan. Haumutuk ita gasta ona, liu dólar tokon rihun lima. Uluk ita fiar loos katak medida sirane'e mak sei mai hatuun kiak. Ita hatama Objetivus Dezenvolvimentu Miléniu nian (koñesidu ho naran MDG) iha ita-nia preokupasaun, iha ita-nia planus. Maibé saída mak ita hetan? No tansa'a?

Loos duni, ita hetan kresmentu ekonómiku ho díjitu rua (12,5%). Hosi sorin seluk, ita produz mos taxa média inflasaun ho 13,5% iha tinan 2011 no 11,8% iha tinan 2012. (Indikadór hirak ne'e laós hau inventa de'it). Taxa inflasaun nian tuun iha tinan 2012 tanba, liu-liu, lei rasik Merkadu nian – kestaun buka no oferta. Saída mak akontese mak valór nominál saláriu ka rendimentu ida nian lakon, mais ou menus, $\frac{1}{4}$ ba nia valór reál. Nune'e, ho valór nominál hanesan bele sosa de'it produtu uitoan, servisu balu de'it, sasán uitoan de'it. Maioria nia podér kompra tuun ho rendimentu kikoan no dependente liu tan.

Na'i Presidente Parlamentu Nasional!

Na'i Primeiru Ministru!

Ilustre Deputadu sira no Membru Governu sira!

Na'i-ulun sira!

Bainhira ita temi taxa média, ita admiti katak iha ida kiik, no seluk ida boot.

Política makro-ekonómika no fiskál ida hodi kombate kiak tenki hatene hatuur-án loloos hodi produtu báziku sira – kabaz mínimu kompras – labele sofre ho taxa mínima inflasaun nian. Nune'e, populasaun sira ho rendimento kiik-liu sei la sofre ho depresisaun ninia rendimento nominál no sei ladún sente afetadu ninia podér kompra.

Saída mak akontese iha Timor-Leste mak kontráriu fali. Pois, taxa média anuál no jerál mak 11,8% iha tinan 2012. Maibé, taxa inflasaun ai-haan sira nian mak 12,5%. Hirak ne'e, sereais (foz no seluk), tubérkulus ho sira-nia produtu atinji kedes 20,9% inflasaun, no modo-tahan, 14,1%.

Ita hotu hatene katak ema sira kiak-liu, sira ne'ebé ho rendimento kiik-liu haan liuliu produtu hirak ne'e ho taxa inflasaun ás-liu média. Ema kiak sira sei desfavoresidu dala rua kedan: sira-nia rendimento kiik-liu no sira terus taxa inflasaun ás-liu. Rezultadu: ema kiak sira sei kiak bá bebeik. Kiak sei sa'e.

Hosi ida ne'e ita bele, la presiza ezersísiu barbarek, konklui katak, objetivamente, fahe rendimentus ba grupu sosiál oioin ita-nia sosiedade nian tende atu agrava ho prejuízu ba sira desfavoresidu-liu. Ne'eduni urgenti atu hola medidas hodi tau fila-fali justisa sosiál no ekonómika iha fatin, hodi bele prevene potensiál tensaun sosiál ruma.

Na'i Prezidente Parlamentu Nasional!

Na'i Primeiru Ministru!

Na'i-ulun sira!

Hau foin dehan daudauk iha kotuk katak ita-nia ekonomia ladún competitivu bá bebeik, ka la competitiva ona. Dala barak ita hanoin karik, tanba ita sei benefisia hela ho reseita hosi Gáz no Minarai, bainhira ita preokupa damais-liu ho ita-nia ekonomia nia competitividade bele atraza ita-nia dezenvolvimentu. Ami hanoin katak prioridade sei hare'e liu-liu ba dezenvolvimentu infraestrutura ho nível mundiál no ba industrializasaun lais ba país, liu-liu, Kosta Sul (Tasi Mane). Ita tau ita-nia povu tomak hateke ba tasi, konvensidu katak hosi neba'a mak ita-nia soin sei mosu-mai. Nune'e rai-metan – raitén - Timor-Leste nian lakon importânsia.

Halo leitura ida ba Estudo da População Activa (EPA) iha 2010, ne'ebé apresenta kuadru ida preokupante tebtebes. Ami preokupadu bainhira rona katak taxa ofisiál dezempregu 4% no, hamutuk ho idane'e rekoñese mos katak persentajem ba sira ne'ebé kaer servisu iha zona rurál mak 72,1% no iha zona urbana 27,9%. Hosi sorin seluk, rekoñese mos katak persentajem ema inativu sira ho idade boot-liu tinan 15 mak 58,3%. Purtantu, dadus hirak ne'e mak halo ita preokupadu. 72,1% empregadus iha zona rurál sira? Sa'a empregu mak ne'e?

Ita presiza dehan ihane'e katak estudu ida tinan 2010 nian hosi Banco Central dehan joven sira ho idade tinan 15 ka liu, hamutuk, sira rihun 366. Hosi sirane'e mak 58%, sira inativu hela ka dezempregadu.

Presiza husik klaru no definidu loloos baze ba ita-nia ekonomia mak ida ne'ebé, iha faze importante ba ita-nia afirmasaun. No fatór dinamizadór mak ida ne'ebé.

Ita rai illa sorin-oan ida iha sub-rejiaun ho competitividade ekonómika boot nia leet. Ita presiza enkuadra-án iha ita-nia rejiaun no kompete. Atu ita bele halo idane'e laós hatete de'it katak ita rai ne'ebé mak iha kresimentu ekonómiku ás-liu iha rejiaun ne'e. Maibé saída loos mak ita produz? Saída mak kontribui makaas-liu ba ita nia Produto Interno Bruto (PIB)? Oinsa'a ita-nia Merkadu Traballu? Oinsa'a loos índise dezenvolvimentu umanu. Índise loloos kiak nian mak ida ne'ebé?

Loos mak ne'e, mak ita nafatin de'it ho petróleo-mania domina ita-nia política, sei to'o ba iha loron ne'ebé laíha tan odamatan seluk selae ipoteka país. Iha rai ida ho ema liu uitoan tokon ida, ne'ebé liu 60% mak hasoru susar barbarak ba buat hotuhotu no sira seluk 18% vulnerável mos ba susar selseluk, fiar ba taxa ofisiál dezempregu sei, no mínimu, la aseitável. Ita presiza tebes ho urjénsia política makro-ekonómika no fiskál loloos hodi bele combate kiak. Liña orientasaun ne'ebé ita lao-tuir iha tinan sira ikus nia-laran, bele ho intensaun diak, prova ona katak la loloos, ineficiente, no ladún efikáz.

Ita presiza política fiskál ida ne'ebé bele:

1. promove no garante efisiénsia tan iha gastus públikus hodi bele hasae kresimentu ekonómiku no, hamutuk ho ne'e, garante mos populasaun sira nia moris diak;
2. satisfaz objetivu distribuisaun ekuitativa riku-soin no hatuun kiak;
3. Estabiliza ekonomia; Ba ne'e, ita presiza halo jestau ida rasional ba reseita minarai nian hodi bele;
4. hamosu tan rikeza ba emar tomak jerasaun ohinloron nian no ba jerasau aban-bainrúa;
5. garante kresimentu ekonómiku saudável;
6. aumenta despeza pública atu investe hodi garante servisu prioritáriu sira, infraestrutura no dezenvolvimentu ho kapasitasaun kapital umanu;

Na'i Primeiru Ministru!

Na'i-ulun sira!

Ita hotu hatene katak despeza pública, hau reforsa tan, despeza pública, sa'e makaas tebtebes iha tinan lima ikus nia-laran. Orgullu boot tebtebes ba ita-boot nia Governu kresimentu ekonómiku ne'ebé Timor-Leste foin koko. Maski, ita hotu konsiente ba indikadór ekonómiku sira seluk. Karik kresimentu ekonómiku díjitu rua ne'e lori mos mai ita kualidade vida diak liu tan, no mai povu tomak nia moris diak? Hau hanoin, ho neon-moos, katak resposta laós pozitivu hotu.

Mak nune'e, ohinloron ita iha loos ne'ebé? Ita hatama tan rekursus ba ita-nia ekonomia, maski rezultadu la korresponde nafatin ba ita-nia expetativas ka lae? Ka ita buka privilejia liu efisiénsia no efikásia bainhira halao ita-nia programa sira?

SEGREDU MAK NE'E, NA'I PRIMEIRU MINISTRU.

Timor-Leste orasne'e vítima ida ona ba despeza pública to'o resin. Tanba ne'e mak ita hasoru fenómenu inflasaun. Fenómenu ne'ebé mak Governu, ho atu fé deklarada momoos, hatete hakarak combate. Hosi ita-boot nia sorin, hau fiar katak tebes.

Maibé, sa'a kilat mak atu uza hodi halo combate ne'e bele efikáz no eficiente? Oinsa'a ita bele halo sem hatudu uluk mudansa pozitiva ruma ba kestaun política fiskál no ba jestau finansas públikas, no traduz iha estrutura Orsamentu nian? Ita labele fiar, Na'i Primeiru Ministru, bainhira estrutura Orsamentu 2013 hatudu política Orsamentál ida, opsaun ida iha domínio fiskál no opsaun seluk iha jestau Finansas Públikas, no mínimu, kontinua de'it buat sira mai hosi-kotuk.

Mak la nune'e ita hare'e tok:

Ho Orsamentu Jerál Estadu 2013 nia estrutura, ita bele de'it konklui katak laíha política orsamentál no ekonómika ruma koerente ho preokupasaun ba combate inflasaun no kiak. (nem koerente mos ho PED no ho Governu nia Programa).

Loos duni, ita bele hatuun inflasaun ba nível entre 4-5% iha tinan 2-3 nia-laran. Maibé tenki asumi kombate ne'e nu'udar prioritáriu iha Timor-Leste nia políтика ekonómika no halo idane'e reflete iha OJE. Hanoin katak ita bele nu'udar rezultadu de'it hosi efeitu sekundáriu ita-nia makro-políтика, ne'e sala boot ona. Laíha dalan seluk atu tuir selae hakat loloos ba kauza sira, Na'i Primeiru-Ministru.

Solusaun mak halo revizaun ba políтика despezas ho gastus públikus. Ita tenki brani atu asumi ihane'e hahalok ida ho aten-brani liu tan no ho teknika responsável liu tan. Laíha dalan seluk, tenki aperta uitoan montante gastus no altera ninia estrutura. Ho OJE ne'ebé mak hatama mai, bele-hela hatuun despezas, defini hikas prioridade seluk no reforsa instituisaun responsável sira ba ezekusaun orsamentál, adekua Governu ba país nia nesesidades, kombate sobre-faturasaun, desperdísio no rekursus halai-suli hodi benefisia de'it sira minoria oan ida.

Ita sei fó énfaze ba efisiénsia, ba efikásia no ba kualidade (obras, servisus ita presta, etc.).

Urgenti tebes atu defini fukun dezenvolvimentu seluk iha políтика ida momoos hodi lori sidade ba iha kampu. Kualidade moris iha sidade, ho traballu tan, no efisiénsia tan, produsaun liu, no produtividade boot liu, hirakne'e mak karaterística ne'ebé fukun dezenvolvimentu foun tenki iha.

Ita-nia rain labele, nia tomak, hateke nafatin de'it ba tasi mane. Projetu "Tasi Mane" rasik ita presiza hanoin-hikas, ho konsiderasaun ba adiamantu explorasaun Greater Sunrise nian.

Ita hare'e fali bá estrutura orsamentál ne'ebé ita koalia ona iha leten.

Nu'udar exemplu ita bele hatudu kazu Ministériu Saúde nian. Ita bele hare'e.

Hosi livru 4B, 5 no 6 proposta OJE nian ita bele hasai:

Propoen nu'udar Orsamentu totál ba despezas korrentes ba Ministériu Saúde nian USD tokon 61,5 . Idane'e korresponde ba 7,5% ba despezas rekorrentes OJE nian. Doadór sira disponibiliza USD tokon 31,8 (15%) hosi totál apoiu hosi parseiru sira mai Governu.

Ita presiza hatete fila-fali katak dotasaun OJE ba Ministériu Saúde iha konfigurasaun tuir-mai: ospitál sira : 29.4%; Distritu sira: 30.2%. Rubrika rua hamutuk totaliza 59.6%. Tokon hitu (11,3%) mak montante rezervadu ba ai-moruk no tokon lima (8,1%) atu sosa ekipamento médiku

Mak ita tau-hamutuk dadu sira iha leten ita bele konklui hanesan tuir-mai: besik 79,1% OJE ba Ministériu Saúde rezervadu ba prestasaun direta servisus no 20% de'it hosi despezas rekorrentes mak destinadu ba kustus indiretus, ka, administrsaun.

Hosi sorin seluk, fundu infraestruturas, USD tokon 2,5 (0,32%) de'it mak ba iha Ministériu Saúde. Hosi hirak ne'e, USD tokon 1,28 destinadu ona ba harii Ospitál Baucau, tokon ida ba Palácio das Cinzas no rihun 326 ba harii Unidade Intensiva ba Kuidadus Kardíakus iha HNGV.

No iha tan, hosi Fundu Dezenvolvimentu Kapítál Umanu ho USD tokon 38,898, USD tokon 4,372 (12,8%) de'it mak destinadu ba bolsa estudus ba Ministériu Saúde.

Nune'e, entre buat seluk ho gravidade hanesan, ita bele dehan katak iha duni dezekilíbriu momoos ba distribuisaun interna orsamentu iha nível Ministériu nian, hanesan, entre servisu ospitál nian no ba kuidadus primárius, nune'e mos falta ekuidade iha distribuisaun orsamentu entre ospitál sira nomos entre servisu distritál saúde sira.

Ita koalia iha kotuk kona-bá Jestaun Finansas Públikas. Iha domíniu idane'e ita sei temi dala ida tan buat tuir-mai: Iha fulan rua ikus tinan fiskál 2012 nia-laran, governu hasai hosi Fundu Petrolíferu besik USD tokon 500. Governu hatene nanis ona katak imposível atu ezekuta hotu orsamentu ne'e. Tan sa'a entaun ba foti? Kona-bá atu hetan funan, rai nafatin osan idane'e iha Timor-Leste nia Fundu Konsolidadu, ho konsiderasaun ba ninia funan ne'ebé Banku Sentrál selu, sei kiik barak-liu ba Fundu Petrolíferu nian. Ami husu: Sa'a jestaun ba finansas públikas mak ida ne'e?

Na'i Presidente Parlamentu Nasional!

Na'i Primeiru-Ministru!

Ilustre Deputadu sira no Memburu Governu sira!

Na'i-ulun sira!

Hau lakohi abuza ita boot sira nia pasiénsia. Maibé hau laíha dúvidas katak kombate kiak sei hahú hosi halakon asimetrias entre sidade ho kampu. Ho idane'e hau hakarak hatete katak ita presiza privilejia zona sira iha Díli nia liur no hahú política rejionál ida ba dezenvolvimentu integradu. Uluk iha 2005, hau hahú tia ona política idane'e ho nomeasaun membru Governu responsável ba grupu Distritu balu no Oecusse. Tentativa ida atu hakbesik Governu ba populasaun sira. Opsaun ida atu provoka mudansa iha estrutura ukun nian. Karik bele iha seluk diak-liu, molok desentralizasaun ne'ebé lekar iha fatin barbarak. Maibé ita hakarak forma sira estruturante, sistemátiku, koerente, atrativu, competitivu. Iha mínimu, Pakote Referendu (PR), PDD1, PDD2, etc. Ia preenxe rekizitus ezijidu ihane'e ba dezenvolvimentu integradu rejionál.

Iha termus setór privadu nian, ita tenki iha postura ida responsável ba promosaun empreendedorizmu, ba kriatividade. Orsamentu tenki reflete preokupasaun ho insetivu ba harii empreza mikro, kikoan no média, no sei kapasita sira ne'e iha área agro-indústria ne'ebé inklui dezenvolvimentu ba agrikultura no ba transformasaun industrial ba produsaun ne'ebé resin.

La sura ho Minarai, ita iha de'it kafé nu'udar produtu ba exportasaun. Ita tenki halo diak liu tan no aumenta produsaun no produtividade ba kafé. Ba ne'e intervensaun hodi halo renovasaun kultura sira tuan ona.

Na'i Primeiru-Ministru!

Hau hatene katak ita boot iha kompeténsia tomak atu harii no defini orgánika ba ita-nia Governu. Maibé, hare'e ba Governu atuál, la husik dúvidas mai hau katak nia rasik mak meiu ida hodi halo rekursu públiku sira sulin ho forma ida ladún eficiente. Governu boot, boot tebtebes, ba rai ne'ebé mak ita iha. Liu tan idane'e, hau karik bele hatete katak iha konflitu interese ida moris-hela iha ninia laran, sei iha sobrepozisaun atus iha tempu ezekusaun programa sira. Buat hirak ne'e hotu mak atraza prosesu.

Hau-nia lian mak ne'e de'it.

Obrigadu barak.

Mari Alkatiri